

Wolayta - Ayyaanaa Olettana Xoossaa - SW Intro Scriptures

Luqaasa 17:5 Godai kiittidoogeeti, “Nuussi ammanuwaa gujja” yaagidi Godaa oichchidosona.

Roome 10:17 Simmi asi qaalaa siyidi ammanees; qassi issi urai Kiristtoosa qaalaa yootin siyees.

Luqaasa 11:1 Yesuusi issi sohuwan woossees. Woosaa wurssido wode, i erissiyo ashkkaratuppe issoi, “Godau, Yohaannisi ba erissiyo ashkkarata tamaarissidoogaadan, nuuni woigi woossanaakko, nuna tamaarissa” yaagiis.

1 Kiro Ximootiyoosa 2:1-4 Nuuni Xoossaa milatiyoogan, geeshshatetta ubban, sarotettaaninne ashkketettan de7ana mala, asa ubbau, kawotuyyoonne sunttatettai de7iyo ubbatuyyo, Xoossaa oichchanau, woossanau, gaannatanaunne galatanau bessiyoogaa ubbabappa kasetada taani nena erissais. Asai ubbai attanaadaaninne tumatettsaa eranaadan koyiya nuna ashshiya Xoossaa sinttan hagee lo77iyaabaanne ufaissiyaabaa.

Zakkaariyaasa 3:1,2 Hegaappe guyyian, qeese ubbatu halaqai Yaasu GODAA kiitanchchaa sinttan eqqidaagaanne Seexaanaikka Yaasa mootanau appe ushachcha baggaara eqqidaagaa GODAI ajuutan tana bessiis. 2 GODAI Seexaanaa, "Seexaanau, GODAI nena seero; Yerusalaame doorida GODAI nena seero! Ha bitanee tamappe kiyidi attida xiifaa mala gidennee?" yaagiis.

Efisoona 6:12 Aissi giikko, nuuni saluwaa sohuwan de7iya iita ayyaana wolqqatuura, haariyaageetuura, godatettai de7iyaageetuuranne ha xuma biittaa haariyaageetuura olettiyoogaappe attin, asaara baaxetokko.

Efisoona 6:10,11 Wursettan, Godaaninne a gita wolqqan minnite. 11 Xalahee halaqaa iita cimuwa teqqanau intte danddayana mala, Xoossai intteyyo immiyo ollaa maayo ubbaa maayite

Efisoona 6:13-17 Hegaa gishshau, iita gallassan teqqanaunne qassi wurssetta gakkanaassi wareettoogaappe guyyian, minni eqqanau intte danddayana mala, Xoossaa ola miishsha ubbaa oiqqite. 14/15 Hegaa gishshau, xeessan qabattuwaa gixxiyoogaadan tumatettsaa gixxidi, tiran wottiyo ola miishshadan xillotettsaa maayidi, intte tohuwan caammaa wottiyoogaadan sarotettsaa wonggeliyaa mishiraachchuwaa yootanau giigidi, minni eqqite. 16 He ubbaappe aattidi, xalahe halaqai dafidi yeddiyo wonddafiyyaa tama ubbaa toissanau, ammanuwaa ubba wode gonddalledan oiqqite. 17 Ammanuwaa huuphiyan wottiyo birata qophedan wottite; qassi Geeshsha Ayyaanaa bisuwaa, Xoossaa qaalaa, oiqqite.

Ibraawe 4:12 Aissi giikko, Xoossaa qaalai paxa de7eesinne oottees; naa77u zoozee de7iyo bisuwaapekka aadhahidi qarattees. He qaalai shemppoinne ayyaanai, kureenne kolzzee issippe gaittiyoosaa shaakkana gakkanaassi

caddees. Qassi asa wozanan de7iya koshshaanne qofaa i shaakkees.

Luqaasa 4:8 Yesuusi zaaridi, "Xoossaa maxaafai, 'Godau, ne Xoossau goinna; a xalaalau ootta' yaagees" yaagiis.

Efisoona 6:18 Xoossaa woossiiddinne a maaduwaa oichchiiddi, ubba wode

Geeshsha Ayyaan Xoossaa woossite. Hegaa gishshau, minnite; salettoppite; geeshshatu ubbaayyo Xoossaa ubba wode woossite.

1 Sameela Koiruwaa 17:45-47 Yaagin Daawiti Pilisxxeemiya, "Neeni bisuwaa, bodaanne xinqqaa oiqqada ta bolli yaasa; shin taani Ubbaappe Wolqqaama GODAA sunttan, neeni naassido Israa7eela olanchchatu Xoossaa sunttan ne bolli yais. 46 Hachchi GODAI nena ta kushiy aatti immana; taani nena shocana; ne qooriyaakka muuca olana. Pilisxxeema olanchchatu ahaa saluwaa kafotuyyoonne sa7aa do7atuyyo taani hachchi immana; yaatin, Israa7eelan Xoossai de7iyoogaa sa7an de7iya asai ubbai erana. 47 GODAI ba asaa ashshanau toora woikko biso koyennaagaa hagan shiiqida asai ubbai erana; aissi giikko, olai GODAAGAA. I inttena ubbaa nu kushiy aatti immana" yaagiis.

Luqaasa 10:17-20 Laappun tammu asati, "Godau, harai atto xalahetikka ne sunttan nuussi azazettidosona" yaagiiddi ufaissan simmidosona. 18 Yesuusi etassi hegaadan yaagiis; "Seexaanai wolqqanttadan saluwaappe kunddishin, taani be7aas. 19 Intte shooshshaanne masimasuwaa yedhdhidi hemettana mala, morkkiyaa wolqqaan ubbaa bolli inttessi godatettaa immaas. Inttena qohiyaabi aibinne baawa. 20 Tuna ayyaanai inttessi azazettiyo gishshau ufaitoppite; shin intte suntta saluwan xaafettido gishshau ufaittite" yaagiis.

2 Naaantto Qorontoosa 10:3-5 Aissi giikko, nuuni ha sa7an de7ikkokka, ha sa7aa asadan olettoko. 4 Aissi giikko, nuuni olettiyo toorai ha sa7aagaa gidenna. SHin qatuwaa laalanau wolqqaara de7iya Xoossaa tooraa. 5 Nuuni asa qofa xaissoos; qassi Xoossaa eratettaa bolli denddidi xubbiya otoro qofa ubbaa laaloos. He qofa ubbai Kiristtoosayyo azazettana mala omooddoos.

2 Naaantto Ximootiyoosa 1:7 Aissi giikko, Xoossai nuuyyo wolqqaan, siiquwaanne nu huuphiyaa naagiyogaa immiya Geeshsha Ayyaan immiisippe attin, yashsha ayyaanaa immibeenna.

Maatiyoosa 12:28,29 SHin Xoossaa Geeshsha Ayyaanai tau wolqqaan immin, taani xalaheta kessiyaabaa gidikko, simmi Xoossaa kawotettai inttekko yiichchiis. 29 "Woi asi kasetidi, wolqqaama asa qachchennan de7iiddi, a keetaa gelidi, a miishshaa bonqqanau waanidi danndayii? Qachchidoogaappe guyyian, a keetaa bonqqana danndayees.

Efisoona 1:13 Intteyyookka qassi hegaadan haniis; tumu kiitaa, intteyyo atotettaa ehiida wonggeliyaa mishiraachchuwaa, intte siyido wode Kiristtoosa ammanideta; Xoossai intteyyo immana giido Geeshsha Ayyaanaa baggaara, intte abaa gidiyoogaa erissiya maatafaa intte bolli

wottiis.

**Yesuusi Kiittidoogeetu Oosuwaa 19:6 PHauloosi ba kushiyaa eta bolli wottido
wode Geeshsha Ayyaanai eta bolli wodhdhin, dumma dumma qaalan
haasayidosona; qassi hananabaakka yootidosona.**

**Marqqaosa 16:15-18 I eta hagaadan yaagiis; “Sa7a ubbaa biidi, asa ubbau
wonggeliyaa mishiraachchuwaa yootite. 16 Ammaniyaageenne
xammaqettidaagee attana; shin ammanennaagaa bolli Xoossai pirddana.
17 Ammaniyaageetuyyo ha malaatati imettana: eti ta sunttan xalaheta
kessana; qassi eti dumma dumma qaalan haasayana. 18 Eti shooshsha
oiqqikkokka, woi marzze uyikkokka eta qohenna. Qassi eti bantta kushiyaa
hargganchchatu bolli wottana; wottin he hargganchchati paxana” yaagiis.**

**1 Kiro Yohaannisa 1:9 SHin nuuni Xoossau nu nagaraa paaxikko, i nu
nagaraa atto gaanaunne nu mooro ooso ubbaappe nuna geeshshanau,
ammanttiyaagaanne tumubaa oottiyaagaa.**

**Kessaabaa 20:5 Etayyo hokkoppa woikko etayyo goinnoppa. Aissi giikko,
taani, GODAI ne Xoossai qanaatiya Xoossaa; tana ixxiyaageeta aawatu
nagaraa gishshau, naata heezzanto yeletaanne oiddantto yeletaa
gakkanaassi qaxxayiyaagaa.**

**Mazamure 109:17 I qangganau dosido gishshau, ikka qanggettidaagaa gido! I
anjjanau dosenna gishshau, anjjoji appe haakko!**

**Daannatu Maxaafaa 16:16 Hachchi hachchi zaara zaara oichchada waissin,
haniyoobaa xayiis.**

**Efisoona 4:26 Hanqgettite; shin intte hanqquwan nagaraa ootoppite. Intte
hanqetti uttidaashin, awai wuloppo.**

Roome 14:12 Simmi nuuni huuphiyan huuphiyan nubaa Xoossau yotana.

**1 Kiro Yohaannisa 2:23 Na7aa erikke giya oonaaninne Aawai de7enna;
Na7aa erais giya oonaanikka qassi Aawai de7ees.**

**Yohaannisa 14:6 Yesuusi zaaridi, “Ogee, tumainne de7oi tana; ta baggaarappe
attin, ooninne ta Aawaakko baanau danddayenna.**

**Maatiyoosa 11:28-30 “Daafuranchchatoo, deexuwaa tookkiyaageetoo, ubbat
taakko haa yiite; taani inttena shemppissana. 29 Taani ashkenne
wozanappe kauyyiyaagaa gidido gishshau, ta qambbaran waaxettite;
taappe tamaarite; intte shemppuwaukka intte shemppo demmana. 30 Aissi
giikko, ta qambbarai giiga; qassi taani inttena toossidoogeekka kaushsha”
yaagiis.**

**2 Naaantto Qoronttoosa 6:2 Aissi giikko Xoossai, “Taani inje wodiyan neeni
giyoogaa siyaas; qassi atotettaa gallassi nena maaddaas” yaagees. Be7ite,
inje wodee ha77a. Be7ite, atotettaa gallassai hachcha.**

**Roome 10:13 Aissi giikko, Xoossaa maxaafai, “Godaa sunttaa xeesiya ooninne
attana” yaagees.**

Pastor T. John Franklin

Church of Salvation, Healing, and Deliverance - COS-HAD.org